

Lima universiti tempatan antara 100 terbaik Asia

KUALA LUMPUR: Universiti Sains Malaysia (USM) yang menjadi universiti Program Pemacuan Untuk Kecemerlangan (Apex) pertama negara, menduduki tangga ke-69 di belakang Universiti Malaya (UM) serta Universiti Kebangsaan Malaysia (UKM) yang masing-masing pada kedudukan ke-39 dan ke-51 dalam senarai 100 universiti terbaik Asia.

Penarafan universiti serantau yang pertama kali dikeluarkan oleh QS Quacquarelli Symonds Ltd, iaitu penyusun Times Higher Education-QS World University Rankings, turut menyenaraikan Universiti Teknologi Malaysia (UTM) pada tangga ke-82 dan Universiti Putra Malaysia (UPM) ke-90.

Pengarah Urusan QS, Nunzio Quacquarelli, berkata keputusan penarafan QS.com Asian University Ranking dibuat berdasarkan ukuran kecemerlangan serantau sesebuah universiti.

Beliau berkata, universiti terbaik bukan hanya cemerlang dari segi kualiti, malah produktiviti tinggi dalam penyelidikan berbanding uni-

versiti lain.

“Prestasi universiti Malaysia adalah baik dengan bilangan pelajar antarabangsa dan fakulti yang banyak. Keputusan ini menjadikan belajar di Malaysia sebagai pilihan menarik kepada pelajar antarabangsa,” katanya dalam satu kenyataan semalam.

Sementara itu, tiga universiti di Hong Kong menduduki lima tangga terbaik dalam senarai penarafan dengan University of Hong Kong pada tangga teratas, diikuti The Chinese University of Hong Kong, kedua dan Hong Kong University of Science and Technology keempat.

University of Tokyo dan Kyoto University di Jepun masing-masing menduduki tangga ketiga dan kelima.

“Keputusan ini menjadikan belajar di Malaysia sebagai pilihan menarik kepada pelajar antarabangsa”

Nunzio Quacquarelli
Pengarah Urusan QS

BERITA HARIAN

12/5/09